

→ BENCANA

[FOTO FARIZUL HAFIZ AWANG/BH]

MISI BANTUAN KE ACEH

Serah bantuan air bersih, tenaga solar

BERITA HARIAN (BENCANA) 5 MEI 2016 M/S 11

→ Pelajar UMP bantu anak yatim mangsa tsunami

Oleh Amin Ridzuan Ishak
aminridzuan@bh.com.my

Bandar Aceh

Kesukaran penghuni Pesantren Dayah Nurul Huda untuk menikmati kemudahan air lebih bersih dan kemudahan elektrik berakhir menerusi Misi kemanusiaan ke Aceh anjuran Universiti Malaysia Pahang (UMP).

Sebahagian besar penghuni pesantren itu adalah anak yatim le-

laki dan perempuan berusia antara tujuh tahun hingga 20 tahun yang kehilangan ahli keluarga yang terkorban dalam kejadian tsunami pada Disember 2004.

Program dikendalikan Fakulti Teknologi Kejuruteraan (FTEK) dengan kerjasama Persatuan Wanita UMP (MATAHARI) dan Universiti Syiah Kuala (UNSYIAH) itu turut membabitkan kerja mengecat rumah dan sesi penerangan kepada penghuninya dalam menghadapi kecemasan.

Berkongsi kepakaran

Penasihat MATAHARI, Datin Fazia Ali, berkata pihaknya menyediakan alat penapis bekalan air bersih dan lampu berkuasa solar bagi kemudahan penghuni rumah kebajikan itu, sejajar dengan pelan strategik UMP 2016-2020 bertepatan memasyarakatkan teknologi iaitu berkongsi kepakaran dengan masyarakat demi manfaat bersama.

"Kita turut bekerjasama dengan beberapa universiti di sini seperti UNSYIAH dan Universiti Teuku Umar yang menyatakan keprihatinan kepada mereka yang serba kekurangan kerana berada di kawasan pedalaman.

"Beberapa program dilaksanakan berteraskan modul pendidikan, modul sosial dan modul ke-rohaniaan, kita turut mengadakan kelas mengajar bahasa Inggeris dan kenduri bersama penduduk kampung," katanya selepas majlis gotong-royong di Pesantren Dayah Nurul Huda di sini, semalam.

Yang turut hadir, Presiden MATAHARI, Prof Datin Dr Mimi Sakinah Abdul Munaim dan Pengerusi Pesantren Dayah Nurul Huda, Tgk Darman M Daud.

Selain bantuan alat penapis air dan lampu berkuasa solar, UMP turut memberikan bantuan wang tunai serta barangan keperluan persekolahan dianggarkan keseluruhannya bernilai RM10,000.



Fazia (kiri) menunjukkan cara menggunakan alat penapis bekalan air bersih kepada penghuni Rumah Kebajikan Dayah Nurul Huda di Bandar Aceh, semalam.